

# FISI NA THIAKA



Kimotho G. Gabriel

Kimechapishwa na:  
Starlink Translation Centre  
P.O. Box 241-00600 Nairobi

© Kimotho G. Gabriel, 2017

Haki zote zimehifadhiwa. Hairuhusiwi kuiga, kunakili,  
kupiga chapa, kutafsiri au kukitoa kitabu hiki, kwa jinsi  
yoyote ile, bila idhini, kwa maandishi, ya Kimotho G.  
Gabriel.


Chapa ya kwanza 2017

ISBN 978-9966-

Michoro imechorwa na Abraham Ngume

Kurasa zimeruwazwa na Puritan Designs

Hapo zamani, katika msitu wa Ngorika  
paliishi mzee mmoja kwa jina Thiaka.  
Thiaka aliishi kando ya msitu huo  
uliotoka Nyaituga hadi Rutara. Thiaka  
alikuwa na kondoo wengi sana.



Katika msitu ule kulikuwa na Fisi mmoja ambaye alisalia baada ya Thiaka kuwaua wengine wote. Aliwaua kwa kuwa walikuwa wakiwala kondoo wake. Fisi aliyesalia aliweka mkataba na Thiaka kwamba hatawahi kula kondoo wake na pia hatawahi kuja kwa boma lake.

Mkataba huo wa Thiaka na Fisi ulidumishwa kwa miaka mingi. Mara nyingi Thiaka alipoenda kuwinda Swara kwenye msitu ule alikutana na yule Fisi. Walipokutana walikumbushana juu ya mkataba wao. Thiaka hakuwahi kumjeruhi yule Fisi ama kutaka kumwua. Fisi naye alikaa kule msituni na hakuwahi kwenda kwenye boma ya Thiaka. Mazoea ya Thiaka na Fisi yule kukutana wakati wa mawindo yalikuwa kawaida.



Siku moja Thiaka alipokuwa msituni, Fisi alimjia mbio na kumwambia kuwa kulikuwa na Swara mkubwa mno kiasi kwamba yeye Fisi hangeweza kumwua.



Aliahidiana na Thiaka kwamba wangemwua yule Swara kwa pamoja halafu wagawanye nyama zake. Thiaka alikataa na kumwarifu kwamba yeye ndiye angemgawia Fisi nyama zake halafu naye achukue zake. Alimsisitizia kwamba yeye ndiye angemwua. Fisi alikubali. Thiaka naye alikubali kumgawia matumbo, mara, shingo na kichwa.

Fisi alimwonyesha Thiaka alipokuwa yule Swara. Thiaka alimwangalia sana na kugundua shida yake. Yule Swara alikuwa amekula mmea fulani kule msituni ambao uliifurisha tumbo lake. Thiaka alijua kuwa kazi yake ilikuwa rahisi. Alimlenga shingoni kwa mkuki



wake na kumwangusha. Hakuwa  
na nguvu za kutoroka. Alimfikia na  
kumkata shingo. Kabla ya kumchinja,  
alimdunga tumboni kwa kisu chake na



hewa nyingi ikatoka. Hewa hiyo ilikuwa na harufu kali iliyoenea juu. Hewa hiyo ilienezwa na upepo kila bonde.

Fisi alifika alipokuwa Thiaka na akapewa matumbo. Thiaka alimwonya Fisi kuwa lazima angeosha matumbo





yale kabla ya kuyala. Fisi aliyabeba hadi mtoni. Alipokuwa anarudia mara, alipatana na Thiaka akiwa na nyama zake akielekea nyumbani. Fisi naye alichukua mara na kuelekea hadi mtoni ili baadaye ang'ang'ane na kichwa.

Karamu iliyokuwa kwa Thiaka siku ile ilifana sana. Nyama ya Swara mzima alichomwa vizuri na harufu ilisheheneza hewani. Harufu hii ilimleta Fisi hadi karibu na nyumba ya Thiaka. Mara Fisi wengine kutoka bonde la pili wakawa pia wamefika. Walimwendea yule Fisi na kuulizia sheria za pale. Fisi aliwaambia vyema kuwa walikuwa na mkataba kwamba wasile mifugo ya Thiaka naye hatawaua. Waliambiwa kwamba mifupa haikuwa na shida yoyote. Fisi aliwaambia wenzake lazima wangojee hadi jioni ili wale yale mifupa.

Jioni ilipofika, wale Fisi waling'ang'ania mifupa iliyotapakaa pale nje. Yule Fisi kwa uroho wake alijaribu kuumeza mfupa wa muundi bila kuutafuna. Mfupa ulimkwama kooni. Alishindwa na kuutema wala kuumeza.



Koo la Fisi lilifura. Fisi akajikokota hadi chini ya ghala la mahindi na kukaa akiuangalia mlango wa nyumba ya Thiaka. Aliogopa kugongwa bila habari. Mboni za macho yake zilikuwa zimetokezea kama za panya aliyenaswa na mtego. Aliomba kimoyomoyo huku machozi makali yakimtoka.

*Mfupa wangu mfupa*

*Naomba utoke sasa*

*Ama nikumeze kabisa.*

*Mfupa toka sasa*

*Waniumiza kooni*

*Nitakutwa hapa mfupa*

*Jua likija nitalia*

*Basi kama hutaki*

*Kutoka kaa kubafu!*

Aliyasema maneno ya mwisho  
baada ya kuona kwamba hakuweza

kuuhimiza mfupa utoke. Aligundua kuwa jinsi alivyoongea ndivyo alivyoumia zaidi. Aliamua kukaa kimya na kungoja. Fisi wengine walimwacha kule na kurudi kwao.

Asubuhi jua lilichomoza mapema kuliko siku zote. Lilichomoza kumwanika mwizi aliyekuwa nje ya boma ya Thiaka. Mke wa kwanza wa Thiaka ndiye aliyekuwa wa kwanza kuamka. Alipokwenda ghalani kuchukua kuni alirudi mbio. Alimwita Thiaka aliyetoka na fimbo yake kubwa. Thiaka aliangalia kwenye mvungu wa ghala na kumwona Fisi ambaye alimwangalia kwa hasira kama aliyetaka kumpiga. Thiaka aliizungusha fimbo yake kichwani mara





nne na kumlenga sawa sawa. Alimpiga kwa nguvu zake zote. Mlio wa Fisi uliusukuma mfupa uliotoka kwa kasi. Fisi naye alipiga nduru huku akitoroka mbio. Alimwacha Thiaka akicheka.

Alifika ng'ambo ya pili na kuwakuta Fisi wenzake wamemngojea. Alihemahema sana. Alikuwa na nundu kubwa mgongoni mahali fimbo ya Thiaka ilipotua. Fisi mmoja alimwuliza;

“Mbona umekawia kwa Thiaka namna hii”

“Nilitaka kumwonyesha kuwa hata mimi naweza kulala kwake.” Fisi alijibu.

“Basi umefurahia nini?” Fisi mwingine alimuuliza.

“Nimeudhika sana kusikia jinsi wake zake walivyomtetesha.” Fisi alijibu.

“Ukafanya nini?” Fisi mwingine akauliza.

“Nikamwita na kumweleza kuwa yeye ni mwanamume.” Fisi akasema.

“Alikusikia?” Akauliza Fisi mwingine huku wote wakifungia kicheko.

“Ehe, aliwapiga sana asubuhi.” Fisi akajibu.

Fisi wote waliangua kicheko kikubwa kilichomkasirisha mwenzao. Maumivu aliyokuwa nayo kooni na mgongoni hayangemwezesha kupigana nao. Aliwaangalia tu kwa jicho mbaya.

Hapo ndipo wenyeji wa upande ule walianza kuulizana, “Umekasirikaje kama yule aliyekuwa kwa Thiaka?”

## Maswali

1. Mzee Thiaka aliishi katika msitu gani?
2. Fisi alimwambiaje Thiaka?
3. Mzee Thiaka alimpa Fisi nyama gani?
4. Mfupa gani ulikwama kooni mwa Fisi.
5. Fisi alijificha wapi?
6. Fisi aliwandanganya Fisi wenzake nini?
7. Kwa nini Fisi waliangua Kicheko?
8. Thiaka aliteteshwa na nani?
9. Kutokana na kisa hiki, je! Fisi ni mjinga?
10. Nani alipiga nduru? Kwa nini?